



Llywodraeth Cymru

SgiliauSeroNet@llyw.cymru

XX Rhagfyr 2023

Annwyl Gyfaill,

Ymgynghoriad: Sgiliau sector sero net Cymru

Diolch yn fawr am y cyfle i gymryd rhan yn yr ymgynghoriad uchod. Mae'r ymgynghoriad yn ceisio barn ynghylch y sgiliau fydd eu hangen ar weithlu sectorau sero net yng Nghymru, a hynny er mwyn sicrhau dyfodol gwyrddach, tecach a gwell i Gymru. Mae'r ddogfen ymgynghori yn cyfeirio at yr angen am weithlu dwyieithog yn y sectorau sero net, ac hefyd yn cydnabod y pwyslais ar addysg a hyfforddiant cyfrwng Cymraeg yn strategaeth [Cymraeg 2050](#).

Er hyn, hoffwn weld mwy o ystyriaeth ynghylch potensial ehangach y sector sero net i gyfrannu at ffyniant economaidd ardaloedd sydd â dwysedd uchel o siaradwyr Cymraeg, a thrwy hynny gyfrannu at gynnal a chefnogi'r Gymraeg fel iaith gymunedol. Mae angen i'r gwaith o ddatblygu'r mapiau ffyrdd sgiliau sector ystyried ymhellach y berthynas rhwng datblygiad economaidd a hyfywedd y Gymraeg, ac yn fwy penodol botensial datblygiadau economaidd sero net i sicrhau ffyniant economaidd yr ardaloedd hynny lle mae'r Gymraeg ar ei chryfaf.

Mae ein hymateb ni felly yn canolbwyntio ar y materion canlynol:

- Y berthynas rhwng y strategaeth sero net a pholisïau Llywodraeth Cymru ynghylch cefnogi economi cymunedau Cymraeg eu hiaith
- Y berthynas a'r potensial sy'n bodoli rhwng rhai sectorau sero net penodol a chymunedau Cymraeg eu hiaith. Mae sectorau fel amaethyddiaeth, defnydd tir a

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



choedwigaeth a chynhyrchu trydan a gwres yn cynnig cyfleoedd economaidd amlwg i ardaloedd lle mae dwysedd uchel o siaradwyr Cymraeg.

- Pwysigrwydd cynllunio addysg a llwybrau hyfforddiant iaith Gymraeg lleol yn y sectorau penodol hyn. O gynllunio'n bwrpasol mae cyfle i ddatblygu sgiliau'r boblogaeth i gynnig swyddi o ansawdd da, i annog pobl ifanc i aros yn eu hardaloedd, ac i ddiwallu anghenion economaidd y dyfodol yn yr ardaloedd hyn.
- Cyfraniad y sector sgiliau sero net at y strategaeth genedlaethol ar gyfer cynyddu defnydd y Gymraeg mewn gweithleoedd ac wrth ddarparu gwasanaethau

1. Y strategaeth sero net, Cymraeg 2050 a chryfhau cymunedau Cymraeg

Mae cefnogi seilwaith economaidd-gymdeithasol cymunedau Cymraeg yn un o amcanion craidd strategaeth iaith Gymraeg Llywodraeth Cymru. Mae strategaeth [Cymraeg 2050](#) yn pwysleisio pwysigrwydd datblygu economi ffyniannus, gynaliadwy er mwyn cynnal a chryfhau'r cymunedau hynny lle mae dwysedd uchel o siaradwyr Cymraeg. Yr her yw sicrhau fod gan bobl swyddi o ansawdd da, gyrfaedd deniadol a chartrefi er mwyn iddynt allu aros, neu ddychwelyd, i'r cymunedau hynny. Mae'r sector sero net, fel economi fydd yn gynyddol allweddol yn y dyfodol, yn hynod arwyddocaol yn y cyd-destun hwn.

Fel rhan o'i strategaeth ar gyfer cefnogi cymunedau Cymraeg, mae Llywodraeth Cymru wedi sefydlu Comisiwn ar Gymunedau Cymraeg, fydd yn gyfrifol am ystyried ffyrdd o gryfhau sefyllfa'r Gymraeg fel iaith gymunedol. Yn ei [bapur safbwynt](#) cychwynnol a gyhoeddwyd ym mis Mehefin 2023, mae'r Comisiwn yn gwneud y cysylltiad rhwng yr angen i gefnogi ffyniant economaidd cymunedau Cymraeg, a'r cyfleoedd cyffrous sy'n bodoli yn sgil datblygiadau economaidd sero net. Mae papur safbwynt y Comisiwn yn gweld potensial i economi ardaloedd gorllewinol Cymru ymgryfhau yn sgil '*cyfleoedd economaidd trawsnewidiad gwyrdd*', yn enwedig gan '*ei bod yn meddu ar lawer o adnoddau naturiol perthnasol*'.

Comisiynydd y Gymraeg
Siambrau'r Farchnad
5–7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5–7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



Mae gorgyffwrdd amlwg yma rhwng rhai o amcanion creiddiol strategaeth iaith Gymraeg Llywodraeth Cymru, a'r strategaeth sy'n bodoli ar gyfer cyflawni ymrwymadau sero net. Nid yw'r ymgynghoriad yn ystyried y cysylltiadau hyn yn ddigonol, nac yn egluro rôl allweddol y sector sgiliau yng Nghymru yn y cyd-destun hwn. Rydym yn argymhell eich bod yn cysylltu â'r Comisiwn Cymunedau Cymraeg er mwyn deall sefyllfa'r cymunedau yma'n well ac i ddeall sut gall y mapiau ffyrdd adlewyrchu anghenion sgiliau o fewn cymunedau Cymraeg.

1. Anghenion sgiliau sectorau sero net penodol a dyfodol cymunedau Cymraeg

Mae amryw o'r sectorau sero net sy'n cael eu trafod yn yr ymgynghoriad yn berthnasol iawn yng nghyd-destun y berthynas rhwng y strategaeth sero net a dyfodol cymunedau Cymraeg. Hynny yw, mae llawer o'r ardaloedd lle mae dwysedd uchel o siaradwyr Cymraeg hefyd yn ardaloedd lle mae potensial i ddatblygiadau economaidd sero net. Mae felly ystyriaethau penodol o ran anghenion sgiliau yn yr ardaloedd hyn.

2.1 Amaeth, defnydd tir a choedwigaeth

Yng nghyd-destun Deddf Amaethyddiaeth (Cymru) 2023, mae adran 1.2 yr ymgynghoriad yn gofyn pa sgiliau newydd a phontio sydd eu hangen i gefnogi arferion ffermio newydd yng Nghymru. Dangosodd y Cyfrifiad Cenedlaethol bod 43% o weithwyr amaethyddol yn siarad Cymraeg, o gymharu â 19% o'r boblogaeth yn gyffredinol. Amaethyddiaeth yw'r sector cyflogaeth â'r gyfran uchaf o siaradwyr Cymraeg, a dylai ei chefnogi i ffynnu fod yn flaenoriaeth er mwyn sicrhau bod y Gymraeg yn hyfyw yn ein cymunedau gwledig. Mae'r egwyddor hon wedi ei gynnwys ym mhedwerydd amcan rheoli tir yn gynaliadwy Deddf Amaethyddiaeth (Cymru) 2021, sydd yn ei gwneud yn ofynnol i *“gadw a gwella cefn gwlad ac adnoddau diwylliannol a hyrwyddo mynediad y cyhoedd iddynt a'u hymgysylltiad â hwy, a chynnal y Gymraeg a hyrwyddo a hwyluso ei defnydd.”*

Bydd gweithio tuag at gyflawni ymrwymadau sero net yn cael dylanwad sylweddol ar y sector amaeth yng Nghymru, ac felly o reidrwydd ar gymunedau lle mae'r Gymraeg ar ei

Comisiynydd y Gymraeg
Siambrau'r Farchnad
5–7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5–7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



chryfaf. Mae adroddiad Canolfan Polisi Cyhoeddus Cymru [Sgiliau sero net: Mewnwelediadau a thystiolaeth o sectorau allyriadau yng Nghymru](#) (2020: 6) yn adrodd bod 'NFU Cymru yn disgrifio ffermio yng Nghymru fel 'cadarnle i'r iaith Gymraeg. Mae angen trin yr iaith yn ofalus felly wrth i strwythur y farchnad lafur newid. Mae prynu tir fferm ar gyfer dal a storio carbon, er enghraifft, yn newid defnydd y tir ac yn ei dro yn peryglu cydbwysedd ieithyddol ardaloedd.' Mae'r adroddiad yn argymhell bod y Llywodraeth a chyfranogwyr eraill yn y system addysg a sgiliau yn ystyried yr angen am ddarpariaeth leol o gyrsiau a chymwysterau cyfrwng Gymraeg, er mwyn sicrhau bod gweithwyr a defnyddwyr Gymraeg eu hiaith yn cael eu cefnogi drwy gydol y cyfnod pontio. Mae'r asesiad yma yn wir ar gyfer y sector amaeth, yn ogystal â'r sectorau defnydd tir, newid tir a choedwigaeth.

Mae yna felly nifer o ystyriaethau penodol y dylai'r mapiau ffordd eu hystyried yng nghydestun y sector amaeth, defnydd tir a choedwigaeth. Mae angen cydnabod arwyddocâd newidiadau yn y sectorau hyn i ddyfodol cymunedau Gymraeg eu hiaith. Bydd dyfodol y cymunedau arwyddocaol hyn yn dibynnu ar gefnogi'r sector i addasu a newid, a bydd darparu hyfforddiant a sgiliau drwy gyfrwng y Gymraeg yn rhan hanfodol o hyn. Mae angen i'r mapiau ffyrdd ystyried sut bydd datblygu ac uwchsgilio'r gweithlu presennol nid yn unig yn cefnogi agenda sero net, ond hefyd amcanion y Cynllun Ffermio Cynaliadwy, ac amcanion strategaeth iaith Gymraeg y Llywodraeth.

2.2 Sector cynhyrchu trydan a gwres

Mae'r ymgynghoriad yn cyfeirio at ranbarthau o'r DU sy'n briodol ar gyfer cynhyrchu pŵer carbon isel, gyda ffocws posib ar feysydd sy'n flaenoriaethau ar gyfer mynd i'r afael ag anghydraddoldebau economaidd-gymdeithasol. Rydyn ni'n credu bod llawer o'r cymunedau gwledig ac ôl-ddiwydiannol sydd â dwysedd uchel o siaradwyr Gymraeg yn berthnasol yn y cyd-destun hwn. Mae strategaeth Gymraeg 2050 hefyd yn cyfeirio at rai o'r ardaloedd yma fel rhai sydd â phocedi o amddifadedd a thlodi gwledig, a chyflogau cyfartalog sydd ymhlith yr isaf yn y Deyrnas Unedig. Mae'n amlwg i ni felly bod angen ystyried ymhellach potensial datblygiadau yn y sector cynhyrchu trydan a gwres yn yr

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



ardaloedd hynny sydd â dwysedd uchel o siaradwyr Cymraeg; sydd ag adnoddau naturiol perthnasol, ac a fyddai hefyd yn elwa'n sylweddol o fuddsoddiad economaidd-gymdeithasol o'r fath.

Mae'r ymgynghoriad hefyd yn cyfeirio at wneud y mwyaf o berchnogaeth leol, gan gadw manteision economaidd a chymdeithasol yng Nghymru. Rydym yn cytuno bod modelau o berchnogaeth leol dros gynhyrchu egni yn ffordd effeithiol o greu swyddi da mewn ardaloedd Cymraeg. Mae ganddynt hefyd y potensial i gyfrannu at economi'r ardal leol. Rydym yn ymwybodol o sawl menter gymunedol yn y sector cynhyrchu trydan a gwres sy'n gweithredu trwy gyfrwng y Gymraeg, ac sy'n cyfrannu at yr economi leol. Yn ein sgysiau gyda Egni Cymunedol Cymru er enghraifft, mae Partneriaeth Ynni Ogwen ac Ynni Sir Gar yn ymddangos fel modelau esiampl arfer dda o sut i wneud y mwyaf o berchnogaeth leol a chefnogi'r Gymraeg yn rhagweithiol.

Cyfeirir yn yr ymgynghoriad at ymrwymiad i weithio gyda Cyfoeth Naturiol Cymru i gynnal adolygiad o'r dechrau i'r diwedd o'r prosesau trwyddedu morol. Mae llawer o ardaloedd arfordirol Gorllewin Cymru yn cynnwys cymunedau gyda'r dwysedd uchaf o siaradwyr Cymraeg, a gallai'r boblogaeth honno fanteisio ar ddatblygiadau yn y sector yma. Rydym yn ymwybodol bod Menter Môn, sydd hefyd yn gweithredu yn y Gymraeg ac er budd y Gymraeg a chymunedau Môn, wedi datblygu prosiect ynni llif, Morlais. Dylai'r llwybrau ffyrdd fynd ati i ddysgu gan fentrau fel Ynni Ogwen, Ynni Sir Gar a Menter Môn er mwyn deall pa sgiliau oedd yn hanfodol i'w llwyddiant, a pha sgiliau y maen nhw'n rhagweld y byddant eu hangen yn y dyfodol. Mae Ynni Cymunedol Cymru wedi lansio gweithgor ar gydberchnogaeth, gan ddod â datblygwyr masnachol a grwpiau ynni cymunedol ynghyd i rannu gwybodaeth; mynd i'r afael â rhwystrau, a datblygu arferion gorau. Gallai ymgysylltu gyda'r gweithgor hwnnw fod yn ffordd effeithiol o ddysgu am anghenion sgiliau ar lefel leol, ac i feddwl sut y gallai'r llwybrau ffyrdd gefnogi cymunedau Cymraeg eraill i ail adrodd llwyddiannau'r grwpiau ynni cymunedol sy'n bodoli ac yn arloesi eisoes.

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



3. Llwybrau addysg a hyfforddiant iaith Gymraeg lleol

Fel sydd wedi ei nodi eisoes, er mwyn manteisio ar y potensial sy'n bodoli i gefnogi ffyniant economaidd cymunedau Cymraeg drwy ddatblygiadau sero net, mae'n hanfodol bod llwybrau addysg a hyfforddiant addas ar gael yn lleol, a thrwy gyfrwng y Gymraeg. Er enghraifft, os oes gan ardal y potensial ar gyfer datblygiad ynni gwynt, yna mae angen sicrhau bod yna lwybrau hyfforddi i bobl leol fedru manteisio ar hyn, a hynny drwy gyfrwng y Gymraeg. Yn ogystal, dylai cyrsiau sy'n benodol i ddiwydiannau mewn ardal fod mor agos â phosib at yr ardal honno, er mwyn hwyluso pobl i aros a byw yn eu cymunedau.

Gofynna adran 1 yr ymgynghoriad oes yna ddarpariaeth ar gyfer datblygu'r sgiliau angenrheidiol yng Nghymru. Er nad oes gennym ddarlun llawn o'r bylchau sy'n bodoli yn y ddarpariaeth yng Nghymru, fe wyddom fod nifer sylweddol o fyfyrwyr o Gymru yn mynd i astudio i brifysgolion yn Lloegr. Mae'n debyg bod nifer o resymau dros hyn, ac mae'n bosib bod diffyg darpariaeth ddigonol yn rhan o hyn. Mae cyfraddau'r bobl ifanc sy'n gadael Cymru i fynd i'r brifysgol yn dipyn uwch na'r gwledydd eraill ym Mhrydain. Nid oes tystiolaeth ar gael am niiferoedd y myfyrwyr sy'n dychwelyd i Gymru ar ôl graddio, ond mae'n debygol nad yw nifer o'r myfyrwyr yma yn dychwelyd i Gymru ar ôl graddio. Rydyn ni'n gweld hyn fel problem o ran diwallu anghenion Cymru, ac mae'n tanseilio bwriad yr ymgynghoriad yma o gynllunio ar gyfer anghenion Cymru. Dylai'r llwybrau ffordd ystyried sut y gallent chwarae rhan yn yr ymdrech i ddelio â'r ffenomenon yma sy'n ddinistriol iawn, nid yn unig i'r Gymraeg, ond i ffyniant Cymru i'r dyfodol.

Roeddem yn falch o ddarllen yn y papurau ymgynghori fod cynyddu nifer y bobl a all ddysgu drwy gyfrwng y Gymraeg yn flaenoriaeth, a'ch bod yn gweld y cyswllt rhwng hynny a strategaeth Cymraeg 2050. Mae'n bwysig cydnabod fod strategaeth Cymraeg 2050 a'r [Cynllun Gweithredu Addysg Bellach a Phrentisiaethau Cyfrwng Cymraeg](#) â'r bwriad o fynd i'r afael â nifer o'r materion uchod. Awgrymw'n eich bod yn ystyried hyn wrth ddatblygu'r mapiau ffordd, a bod y mapiau yn dangos yn union sut bydd anghenion ieithyddol dysgwyr yn cael eu diwallu wrth ddatblygu cyrsiau, cymwysterau, deunyddiau dysgu ac ymgyrchoedd ymgysylltu.

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



Ychydig iawn o wybodaeth sydd gennym am anghenion sgiliau Cymraeg mewn sectorau gwahanol. Gan fod sero net am fod yn gynyddol bwysig er mwyn cynllunio a gweithredu'n strategol mae angen casglu data dibynadwy er mwyn gosod gwaelodlin o'r darlun cenedlaethol a lleol, ac yna osod targedau ar gyfer gwella. Yn hynny o beth, fe'ch anogwn i gasglu data am y sgiliau Cymraeg sy'n bodoli o fewn y gwahanol sectorau sero net, yn ogystal â faint o sefydliadau sy'n gweithredu trwy gyfrwng Gymraeg. Gallai hyn fod yn drafodaeth i'w chael ar y cyd â'r Partneriaethau Sgiliau Rhanbarthol o bosib.

Gallai gwella'r sail ddata gael effeithiau positif tu hwnt i gynllunio addysgol. Er enghraifft, mae gofynion i asesu'r effaith ar y Gymraeg wrth ystyried ceisiadau cynllunio ar gyfer datblygiadau mawr, ond yn aml mae cynllunwyr gwlad a thref yn adrodd nad oes sail dystiolaeth ganddyn nhw i fedru gwneud asesiadau llawn a dwfn. Rydyn ni'n meddwl y dylai fod yn bosib creu asesiadau o'r sgiliau sydd ar gael mewn cymunedau, yn ogystal â gallu cymunedau i ddatblygu sgiliau, a bod hynny yn rhan o'r fethodoleg o asesu effaith tebygol datblygiadau ar y Gymraeg. Dylai datblygiadau mawr sy'n creu llawer o swyddi o fewn ardaloedd lle mae dwysedd uchel o siaradwyr Cymraeg fedru dangos pa mor debygol y bydd pobl leol o fedru manteisio ar y swyddi hynny. Mae cyfle trwy'r mapiau ffyrdd i gynllunio tuag at fedru gwneud hynny yn y dyfodol.

4. Cynyddu defnydd y Gymraeg mewn gweithleoedd ac wrth ddarparu gwasanaethau

Mae Cymraeg 2050 yn sôn am y gweithle fel gofod allweddol ar gyfer cynyddu'r defnydd o'r Gymraeg. Esbonia bod y gweithle'n ganolog i'n bywydau bob dydd ac yn bwysig o ran datblygiad ieithyddol unigolion, gan ei fod yn gyfle i siaradwyr ar bob lefel ddefnyddio ac ymarfer yr iaith. Mae sicrhau bod addysg a hyfforddiant ar gyfer sgiliau sector sero net ar gael drwy gyfrwng y Gymraeg yn hanfodol yn y cyd-destun cyffredinol hwn.

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



Mae'r pwyntiau uchod yn arbennig o wir yng nghyd-destun sectorau sy'n ymwneud â'r cyhoedd, ac yn darparu gwasanaethau i'r cyhoedd. Mae'n bosib bod rhai sefydliadau hefyd dan safonau'r Gymraeg sy'n golygu bod dyletswydd arnynt i ddarparu gwasanaethau trwy gyfrwng y Gymraeg. Bydd galw cynyddol felly am weithluoedd sy'n medru gwasanaethu trwy gyfrwng y Gymraeg. Mae dros 120 o sefydliadau cyhoeddus yn gweithredu safonau'r Gymraeg, gan gynnwys cynghorau sir, parciau cenedlaethol, colegau addysg uwch, prifysgolion, Llywodraeth Cymru a Chyfoeth Naturiol Cymru, a dros amser bydd mwy o sefydliadau yn dod o dan y safonau. Yng nghyd-destun targed Cymraeg 2050 i gynyddu'r nifer o siaradwyr i filiwn, rydym yn rhagweld y bydd galw am wasanaethau a gweithlu Cymraeg yn cynyddu o fewn sectorau sero net sydd tu hwnt i'r drefn safonau hefyd. Dylai'r mapiau ffyrdd adlewyrchu effaith y galw cynyddol yma am sgiliau Cymraeg o fewn gweithluoedd presennol ac yn y dyfodol.

Rydym yn gobeithio y bydd y sylwadau uchod o ddefnydd i chi yn eich ymgynghoriad, ac rwy'n hapus i fy swyddogion gwrdd â chi i drafod ymhellach. Diolch eto am y cyfle i gyfrannu ato. Mae'n amlwg bod y sector sero net am ddod yn gynyddol bwysig yng Nghymru, ac mae angen sicrhau bod llwybrau hyfforddiant addas drwy gyfrwng y Gymraeg ar gael ar draws Cymru. Mae cyfle gwirioneddol yma i'r mapiau ffordd ddangos yn union sut byddwn yn sicrhau bod hynny'n digwydd.

Yr eiddoch yn gywir,

Efa Gruffudd Jones

Comisiynydd y Gymraeg

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales